

Date – 26/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Aizawl International Half Marathon chu tukin khan Aizawl Mualpuia Rajiv Gandhi Stadium atangin neih a ni a, mi 400 vel an tlan a ni.
2. Mizoram leh Assam ramri chungchang sawiho a state pahnih aiawh thukhawm ten ramri hrulah an inremna anga remna vawn chhonzawm an remti.
3. Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan
4. Pope Francis chu vawiin khan Vatican City-a St.Peter's Square ah vui a ni.

<><><>

HALF MARATHON

Aizawl International Half Marathon chu tukin khan Aizawl Mualpuia Rajiv Gandhi Stadium atangin neih a ni a, mi 400 vel an tlan a ni.

Larsap, General (Retd) Vijay Kumar Singh-ah he intihsiaknaa tel te chu lawmman a hlan a, he intihsiaknaah hian KM 21 hmeichhia ah 1-na chu Tamsi Singh a ni a, darkar 1 min 26 leh sec 57 a hmang a, cheng nuai 1 sing 2 & 5,000 + Medal+ Certificate a dawng a ni.

2-na chu Amrita Patel, darkar 01:27:16 a tlan a, 3-na Shyamali Singh chuan darkar 1:33:59 a hmang a ni.

Mipa KM 21 category ah Heman Singh pakhatna a ni a, darkar 1 minute 11 leh sec 14 a tlan a, ani pawh hian cheng nuai 1 sing 2 & 5,000+Medal+Certificate a dawng a ni.

2-na Kresstarjune Pathaw nen sec 5 in an inthlau a, darkar 01:11:19 a tlan a, 3-na Amit Ramesh Patil chu darkar 01:12:49 a tlan a ni.

Open Race Category km 10 intlansiak hmeichhia ah 1-na Thelma Lianhmingthangi, 2-na Esther Baite leh 3-na Rinzuali a ni.

Mipa ah 1-na Sushil a ni a, 2-na CK Lianpuia, 3-na Bikhash Sawtal a ni.

FUN RACE CATEGORY km 5 hmeichhia ah 1-na Malsawmdawngkimi a ni a, 2-na Lalrohlui, 3-na Franky Chakma.

Mipa ah 1-na Daniel Lyngdoh Wahlang, 2-na K. Lalhriatpuia, 3-na PC Lalnunmawia.

JUNIOR CATEGORY 5 Km ah 1-na Krishna Kant Sahu, 2na Mangthanmawia, 3-na Ricky Tlangthangpuia te an ni.

Sports & Youth Services Department, Athletic Federation of India leh Innovations India Pvt. Ltd. te tangho buatsaih, Aizawl International Half Marathon

hi tukin dar 6:30 khan Aizawl Mualpuia Rajiv Gandhi Stadium atangin tlan tan a ni a, a tel tam zawk te hi thalai kum 25 atanga kum 40 inkar te an ni a, hriat theih chinah an zinga upa ber Pu VL Bela, kum 90 mi, Aizawl Electric veng, chuan km 5 a thui a tlan a, Aizawl International Half Marathon chu inkawmngeih nan leh nun tihhlim nan tha a tih thu a sawi a, thalaite chu an lo hrisel zawk nan zuk leh hmuam ti lo tur leh thei ei tam a, buh ei tlem tur leh a tam thei ang bera che tam turin a chah a ni.

Sports & Youth Services Minister Pu Lalnghinglova Hmar-in Aizawl International Half Marathon chu taksa sawizawi leh infiamna lam chawilar nan bakah khualzin hipna a ni tih sawiin, kumtin buatsaih an tum tih a sawi a.

Pu Lalnghinglova Hmar chuan Akashvani zawhna chhangin tukina Aizawl International Half Marathon neih zawh tak chu an beisei phak bakin a hlawhtling tih sawiin, Mizoram pawn atangin mi engemawzat an tlan tih a sawi a, marathon tihphungte an hriatthiam chhoh tak avangin nakum lamah chuan mi 5000 vel an tel theih a rin tawh thu a sawi bawk a ni.

Byte: Sports Minister

(Corr: Maremi & Mary)

<><><>

AMC

Aizawl Municipal Corporation chuan dan loa kawng kama thilzuar lui te chu tih chhunzawm tawhlo turin a ngen a, phalna hmuna thil zuar te chauh dawr turin mipuite an ngen bawk.

AMC thuchhuah tarlan danin dan leh thupek bawhchhiaa Aizawl Venghlui leh Tuikual South huamchhunga kawngkama thil zuar lui an awm chu pawl antih thu sawiin phalna hmuna zuar te chauh dawr turin mipuite an ngen tih an sawi a, Aizawl khawpui hmasawnna tur leh a chengte hma ngaiin dan kalha kawng kama thil zuar thinte chu hmun him zawkah a tahtawlin a sawn tih sawiin ti lui an awm zel chu pawl an tih thu an sawi.

SFX ... AMC Announcement

Hetihlai hian, Kawng kama thil zuarten AMC-in kawngsira thil zawrh a khap sak chu an tan a hlawk loh avangin an thlawp lova, kawngsirah an in zuar leh tawh tih an sawi a, Akashvani zawhna chhangin, Tuikual South Local Council huamchhunga chawhmeh zuar thenkhatte chuan AMC thuawih a AMC Building Tuikualah chawlhkar 3 an thut chhung khan an in hralh chhe thei hle niin an sawi a, thutna tur mumal siamsak an nih loh avangin a rem remah hnawh khawm an ni an ti. Hei bakah hian AMC Building garage-a lirthei dahtuten man chawia lirthei an dah avangin chawhmeh zuartute in zawrh theih nan Zirtawp zan apianga lirthei dah chhuah an duh tawh loh thu an sawi bawk avangin an tan a buaithlak hle tih an sawi a, thuneitute chuan Building chung sang bera thut tir an tum bawk avangin anmahni dawrtu tur te pawhin an pan peih lo a, in hralhna tur zatve pawh an in hralh ngai lova, an tan a hlawk loh em avangin ruahsur leh nisa pawh pawisa lovin kawngsira thut an thlang zawk tih an sawi. Kawngsira thil zuarte chu mi harsa tak tak chhungkaw chawmtute an nih avangin an harsatna tawh chu thuneituten ngaihtuah Chiang se an duh tih an sawi a ni.

Byte: Chawhmeh zuar

(Corr: Maremi)



BORDER TALKS

Mizoram leh Assam ramri chungchang sawiho a state pahnih aiawh thukhawm ten ramri hrulah an inremna anga remna vawn chhunzawm an remti.

Mizoram Sorkar leh Assam Sorkar aiawhte ramri chungchanga inbiakna, Secretary Level Official Talk chu nimin khan Guwahati Rohika AAU- International Guest House-ah neih a ni a, hetah hian Mizoram aiawhte chuan Assam lamin ramri hrula hmalakna hrang hrang an neih thin chu ramri boruak ti tha lo thei anih avangin hmala chhunzawm tawh lo turin an ngen a ni.

Inbiaknaah hian Mizoram-in ramri atana a pawm kum 1875 Notification kaihnawih a Assam hnena kum 2023, February ni 13 leh November ni 28-a lehkha an thawnte chu chipchiar taka sawi ho a ni a, kum 1875 Notification-in a huam chin ram chungchang te, khaw hrang hrang awm dan Mizoram-in Assam hnena a pek tawhte sawi ho niin Assam hian Mizoram Sorkar lehkha kum 2023, November ni 28-a thawn chhanna chu mumal takin a hma lamin thawn se, chumi hnuaah Official Level Meeting-ah sawi ho leh ni se, an ti a ni. Official Level Meeting hi hun remchang hmasaah Mizoramah neih leh thuai ni se, Mizoram leh Assam ramri buaina chingfel turin boruak tha tak hnuaiah sawi hova hmalak zel ni se an ti bawk.

Inbiaknaah hian Mizoram aiawhte chu Home Secretary, Pu Vanlalmawia hovin official 7 an ni a, Assam aiawhte chu Border Protection and Development Secretary, Prabhati Thaosen hovin mi 6 an ni a, Cachar, Hailakandi leh Sribhumi DC ten Video Conferencing hmangin an lo zawm ve bawk a ni. Kan corr report lo ngaithla ang.

Voicecast

Mizoram leh thenawm state Assam in kum 2021 July ni 26 a Vairengte dai-a Police-te’n silai hial an hmehpuah avangin ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokal in khatih laia home minister Pu Lalchamlia hovin Mizoram palaite nen an inbia a. A kum lehah Aizawlah bawkin be leh in kum 2022 November thla khan Guwahati-ah minister pahnih kaihhruaite hi an inbe leh a. Vawi tam tak state pahnih palaite bakah Chief Minister ve ve pawh inbe pawhin ramri buai erawh chinfel ala ni rihlo a ni.



WORLD VETY DAY

World Veterinary Day vawiin khan AH&Vety Department, Mizoram State Veterinary Council leh Indian Veterinary Association (Mizoram) tangho buatsaihin Aizawl Khatlaa Veterinary Polyclinic Hospital-ah hun hman a ni a,

Indian Veterinary Association (Mizoram) President Dr.Robert Rualthankhuma kaihhruai he hunah hian ran hrisel nei turin tanho a ngai tih thupui hmangin inzirtirna neih a ni a, hei bakah hian a mamawhte tan, Ui leh Zawhte vaccine pek nghal a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ROZGAR MELA

Prime Minister Narendra Modia chuan vawiin khan Rozgar Mela-ah sawrkar hna hmu thar mi sing 5 leh sang 1 te hnenah appointment letter a hlan. Video Conference hmangin appointment letter hi sem a ni a.Prime Minister Modia chuan ramchhung thalaite chuan ram indinchhoh zelnaah thalai an chak chuan ram a chak thuai thin tih a sawi a. Khawvel hmuhah pawh dinhmun sang a thlen thuai thu a sawi a. Thalaite theihna leh thiamna avangin vawiinah chuan khawvelin India theihna a hmu chho mek a ti a. Vawiina hna hmu tharte pawhin ram sum thawhchhuahna turah mawhpurhna pawimawh tak an neih thu a sawi a ni.

(Byte)

(Newsonair)

<><><>

VATICAN

Pope Francis chu vawiin khan Vatican City-a St.Peter's Square ah vui a ni. Roman Catholic kohhran hruaituten Rome-a Basilica of Saint Mary Major-ah Pope Francis hi an zalh a. Vuina hmunah hian mi nuai leh sing 5 chuang an tel a ni. Khawvel hmun hrang hrang atangin President, Prime Minister, lal chhungkua leh sakhaw hruaitute an kalkhawm a.

President Droupadi Murmui pawh he hunah hian a tel a.President hi Union Parliamentary Affairs Minister Kiren Rijiju, Union Minister of State for Minority Affairs George Kurian leh Deputy Speaker of Goa Legislative Assembly Joshua De Souza ten an tawiawm a. Meghalaya Chief Minister Conrad Sangma pawh he hunah hian a tel.

Anni bakah hian U.S. President Donald Trump, French President Emmanuel Macron, Brazilian President Luiz Inácio Lula da Silva, leh Argentine President Javier Milei an tel a ni.

(Newsonair)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.

(Newsonair)

<><><>